

**Leeter masa Pawl ma
wuzlalatar a
Efez hay**

Mey da ray

Leeter ngada Efez hay

Leeter e keɗe na, ara Pawl ma wuzlalatar a ngada ndəhay daa mecəmey-ray nga Yesu daa berney nga Efez, asaya ngada ndəhay daa mecəmey-ray hay mekele mekele nga Yesu daa berney hay gweegwe ta Efez e. Pawl a wuzlala leeter e na, daa masa anga daa fərsəne. A kəzlamara aa fərsəne he na, maja anga ma wuzey Mey-maaya-mawiya. Ma handa leeter e a Efez na, ara Tisik (6.21).

Pawl a sərta ndəhay mekele mekele daa mecəmey-ray nga Yesu da Efez na, maja ta wuzey mey nga Gazlavay la fetede mevey maakar (SNM 19-20).

Mey mahura masa daa leeter keɗe na, ara cek masa Gazlavay ma wudey nga ka (1.10). «Cek masa aa ma wudey nga ka ha na, ara mecəmey ray nga cek hay da gazlavay da vad ta cek hay da bəla tabiya asi har nga Bay pal, Kəriste.» Cek masa aa ma wudey nga ka ha, a da key na, ta fa mecəmey-ray nga ndəhay nga Yesu.

Daa leeter keɗe na, Pawl aa guzley da ray Gazlavay ma wudta ndəhay kalah (1-2.10). Fa dəba ha, aa guzley da ray Jəwif hay ta Jəwif hay ba hay ma təram nga səkway pal ta fa Kəriste (2.11-3.13). Pawl a kətata Efez hay amba a njam

maaya maaya, a tɔbmara mey nga Yesu ma fɔna ma fɔna, a njam anda ata ma njam zleezle saba (fasɔlawal 4 haa 6).

Daa leeter e keɔe na, mey mekele mekele daha nga vɔley gɔɔaŋ a ndɔhay:

Gazlavay ta kandakwar maaya la ta fa Yesu Kɔriste (fasɔlawal 1 haa 2)

Si zel hay a wudmata ngwas ata hay, ngusay a namatar ray a zel ata hay (5.22-33)

Mey da ray ma key vɔram ta bay-malula (6.10-20)

Mecey-har nga Pawl a Efez hay

¹ Ara yah, Pawl, ma wuzlalakwa leeter keɔe, yah ndaw masa *Gazlavay ma wala nga key *ndaw-meslɔrey nga *Yesu *Kɔriste.

Leeter keɔe ara ngada akwar, ndɔhay nga Gazlavay daa berney nga Efez, akwar macɔmkaya ta Yesu Kɔriste, asaya, akwar ma tɔbmara mey aŋga ta mevel pal.

² Anja Papa alɔkwa, Bay Gazlavay, ta Bay alɔkwa Mahura Yesu Kɔriste nga pɔsmakwar mey, asaya nga njadamakwar daa zazay.

Cek hay maaya masa Gazlavay ma vɔldatara a ndɔhay ta fa Yesu Kɔriste

³ Hɔlmakwa Gazlavay, Papaŋ nga Bay alɔkwa Mahura Yesu *Kɔriste. Mepɔsey-mey aŋga kwa wura wura ma sawa ta da vadɔ, aa da ray alɔkwa. Ya hɔtkwa mepɔsey-mey a na, maja alɔkwa macɔmkaya ta Kɔriste. ⁴ Sɔrfadamara,

dəga Gazlavay ta ləma bəla daa ba aranj na, ta walandakwar sem nga cəmey ta Kəriste, amba ya tərkwā ndəhay maaya fa mey anğa, ndəhay masa ta mebərey ba. Gazlavay a wuɗndakwar kalah, ⁵ maja ngenē, ta walandakwar sem dəga zleezle nga tərey bəz anğa hay ta fa Yesu Kəriste. Gazlavay a ka kəne na, maja ta mbafar la, a wuɗey nga ka kəne. ⁶ Da ray ngenē, həlmakwa Gazlavay maja aa ma wuɗndakwar kalah. A wuzdərwa mewuɗey-vaw a na, ta fa sləra masa Bəzey anğa mawuɗkaya kalah ma ka nğada aləkwa.

⁷ Maja aləkwa macəmkaya ta Kəriste na, Gazlavay ta ləhdandakurwa sem dasi har nga bay-malula, asaya, ta mbəkdandakwara mebərey sem ta fa mambaz nga Yesu ma mbəɗwa daa meməcey anğa. Anda keɗe, Gazlavay a wuzdandakwara mesərey dey-ceceh anğa ta mewuɗey-vaw anğa ha na, aa ga kalah nğada aləkwa. ⁸ Ta kandakwar maaya la ga kalah, ta vəlndakwar lenğesl maaya la, ⁹ ta wuzdandakwara cek masa mabadakaya dəga zleezle sem, anda meləvey, cek masa aa ma wuɗey nga ka ta fa Kəriste.

¹⁰ Ta pas masa ɗar a ta wuswa cay na, a da ndəvda cek masa aa ma wuɗey nga ka ha. Cek masa aa ma wuɗey nga ka ha na, ara nga cəmtar ray a cek hay da gazlavay da vad ta cek hay da bəla tabiya asi har nga Bay pal, Kəriste.

1:4 1.4 5.27; Jan 15.16; 17.24; 2Tes 2.13 **1:5** 1.5 Jan 1.12
1:6 1.6 Mt 3.17; Rm 5.2; Kwa 1.13 **1:7** 1.7 meləhey dasi har
 nga bay-malula: Kwa 1.13-14; mambaz: Ef 2.13; Rm 3.25-26; Kwa
 1.20; 1Jn 5.7; mewuɗey-vaw anğa ga kalah: Ef 2.7 **1:9** 1.9-10
 1.22; Kwa 1.16, 20

¹¹ Gazlavay ta wudfey sem amba cek hay tabiya a kam maaya maaya anda anğa ma wudfey nğa ka. Ta wudfey sem dęga zleezle nğa walandar ala *Jęwif hay wal amba ya tęram ndęhay anğa hay macęmkaya ta Kęriste. ¹² Da ray nęene, ala ndęhay masa nęeeme ma pamara Kęriste nğa ndaw ala fara fara na, ala fa hęlmamara Bay Gazlavay maja maaya anğa kalah. ¹³ Akwar ndęhay masa Jęwif hay ba hay may, akwar ta cęndamara *Mey-maaya-mawiya la. Ara mey maaya fara fara ma lęhdakwar maja akwar ma pamara Kęriste nğa ndaw akwar fara fara. Maja nęene, Gazlavay ta vęlkwar Mesęfney anğa la a ray akwar anda aa ma lęvey zleezle a da vęldatara a ndęhay anğa hay. Mesęfney a na, ara anda cek matęhkaya fa dęngay nğa sęrey akwar na, ndęhay anğa hay. ¹⁴ Maja alękwa ma hętkwa *Mesęfney nğa Gazlavay na, ya sęrkwa fara fara Gazlavay a da vęldandakwara cek hay maaya tabiya masa anğa ma lęvey a da vęldatara a ndęhay anğa hay heyey. Ya da hętkwa cek hay a na, daa masa alękwa ta lęhkwa cay daa cek hay maaya ba da bęla kefe *. Anda kefe, hęlmakwa Bay Gazlavay maja aa ta gędaņ.

Pawl a kar suse a Gazlavay daa medęrey-dęngay

¹⁵ Anda kefe, dęga yah ma cęnda akwar fa tębmara mey nğa Bay alękwa Mahura Yesu, ta

1:11 1.11 1.4; Rm 8.28-29 **1:13** 1.13 4.30; 2Kwr 1.22; Kwa 1.5

* **1:14** 1.14 Ya da hętkwa cek hay maaya tabiya masa Gazlavay ma lęvey a da vęldandakwara na, ta pas masa Bay Mahura Yesu ma da vęhwa a bęla (Rm 8.23). **1:14** 1.14 4.30; 2Kwr 1.22

akwar fa wudmata ndəhay nga Gazlavay cəpa na, ¹⁶ ya fa key suse a Gazlavay maja akwar mandaw mandaw. Daa masa ya fa dorey dangay a Gazlavay na, ya fa sərfadakwar. ¹⁷ Ya fa dorey dangay a Gazlavay nga Bay aləkwa Mahura Yesu *Kəriste. Gazlavay a, ara Papan ta gədan. Yaa cəfda amba a vəkwar lenjesl, a wuzdakwara ray anga amba ka sərmara maaya maaya. ¹⁸ Asaya, ya faa cəfda Gazlavay amba a pa mewedey anga aa mevel akwar, amba ka sərmara cek hay maaya kalah masa aa ma da vəldakwara. Da ray ngene, cek hay maaya kalah ha na, akwar fa səkwara maja ka sərmara ka hətam la fara fara. Ka hətam la fara fara, maja Gazlavay a zəkwar nga terey bəz anga hay. Ya faa cəfda saya amba ka sərmara mepəsey-mey anga masa maaya ara mey ba, masa aa ma diya amba a vəldatara a ndəhay anga hay. ¹⁹ Asaya, ya faa cəfda Gazlavay amba ka sərmara gədan anga ma jəndakwar, aləkwa ndəhay ma təba mey nga Yesu. Gədan anga ha na, a fənta gədan hay nga cek hay tabiya. ²⁰ Ara gədan masa ma sləkfadərwa Kəriste daa meməcey. Ara gədan a saya ma təpda Kəriste he a vad nga njeý aa slam maaya ta har-zəmay nga Gazlavay. ²¹ Fetede, Kəriste he fa wey da ray mesəfney hay maaya ta maaya ba hay tabiya masa ma wam da ray cek hay tabiya da vad ta da bəla. Gədan nga Yesu na, a fənta gədan nga bay hay tabiya ma wam wure kefe da bəla ta nga bay hay tabiya

1:16 1.16 Kwa 1.3 **1:17** 1.17 5.17; MM 2.6; Kwa 1.9-10 **1:18**
 1.18 4.4; Kwa 1.12 **1:19** 1.19-20 2Kwr 13.4; Kwa 2.12 **1:20**
 1.20 SNM 2.33; Kwa 3.1

ma da wam ngada fa mey. ²² Ahaw, Gazlavay ta pata cek hay tabiya sem asi har nga Kəriste. Asaya a pa Kəriste nga *bay-ray nga mecəmey-ray nga ndəhay anğa hay. ²³ Yaw, mecəmey-ray nga ndəhay anğa hay na, ara anda vaw anğa. Kəriste fa wuzwa vaw a ndəhay tabiya da bəla. A wuzwa vaw na, ta fa mecəmey-ray nga ndəhay anğa hay a. Ara anğa ma vəltar heter a cek hay tabiya kwa daa wura daa wura cəpa.

2

Gazlavay a vəldakwar heter na, ta fa Yesu

¹ Zleezle masa akwar ta təbmara mey nga *Kəriste daa ba aran na, akwar anda ndəhay maməctakaya, maja akwar ta mebərey, akwar fa kam cek hay malamba. ² Daa ngene, menjey akwar na, maaya ba, anda ndəhay da bəla kede ma sərmara Gazlavay ba. Akwar fa təbmara mey nga *Satan, bay-malula, ma wey da ray mesəfney maaya ba hay ma pəkam daa memed da bəla. Bay-malula ha na, anğa fa wata ndəhay ma rəsmara mey nga Gazlavay haa wure kede. ³ Daa masa aləkwa ma təbkwa mey nga Kəriste daa ba aran na, aləkwa kəne may, maja daa ngene na, ya kakwa cek hay maaya ba

1:21 1.21 6.12; Rm 8.38; Gal 4.8-9; Kwa 1.13, 16, 20; 2.9-10, 15, 20 **1:22** 1.22 1.10; 4.15; 5.23; Ps 8.7; Kwa 1.18; 2.19 **1:23** 1.23 mecəmey-ray nga ndəhay nga Yesu ara anda vaw anğa: 2.16; 4.1-16, 25; 5.30; 1Kwr 12.4-11, 27; Kwa 2.19; Kəriste aa daa mecəmey-ray nga ndəhay anğa hay: 2.14, 18; 4.1-6; Kwa 3.15; Gazlavay a nje ta ndəhay anğa hay: 3.19; 4.10 **2:1** 2.1 2.5 **2:2** 2.2 6.12; Jan 12.31; 14.30; SNM 26.18; 1Jn 2.16

tabiya anda mevel aləkwa ma wudfey. Aləkwa fa kakwa cek hay tabiya anda lengeſl aləkwa ta vaw aləkwa ma wudfey. Maja cek hay maaya ba hay a na, Gazlavay a da cey mevel ga a ray aləkwa anda aa ma cey mevel a ray ndəhay siya may.

⁴ Ama Gazlavay na, ara ndaw ma sərey dey-ceceh fa ndaw. Ta wudndakwar la ga kalah.

⁵ Da ray ŋgene, kwa daa masa aləkwa anda ndəhay maməctakaya maja mebərey aləkwa na, Gazlavay ta cəmdakwar la ta Kəriste, ta vəldakwar heter mawiya la. Sərfadamara, ara ta fa maaya ŋga Gazlavay a, akwar ma ləham daa mebərey. ⁶ Gazlavay ta sləkfdandakurwa sem daa meməcey daa slam a ta Yesu Kəriste na, maja aləkwa macəmkaya ta Kəriste he. Asaya, ta njadandakwar sem daa slam a ta aŋga da gazlavay a vad ŋga wey da ray cek hay tabiya.

⁷ A wuzdərwa maaya aŋga ŋgada aləkwa ta fa Yesu Kəriste anda kefe na, amba a wuzdatara a ndəhay ŋgada fa mey, mesərey dey-ceceh aŋga ta mewudfey-vaw aŋga ha na, aŋga ga kalah.

⁸ Yaw, ara ta fa maaya aŋga ha Gazlavay ma ləhdakwar daa mebərey maja akwar ma təbmara mey ŋga Yesu. Akwar ma ləham a na, ara ta gədan akwar ba, ama ara Gazlavay ma vəldakwara gədan ŋga ləhey a. ⁹ Gazlavay ma ləhdakwar na, ara maja sləra akwar maaya masa akwar ma kamara ba. Anda kefe, ka da zlapam

2:3 2.3 5.6, 8; Rm 1.28; Kwa 3.6 **2:4** 2.4 Rm 8.39; 9.16; Jak 5.11 **2:5** 2.5 2.8; Rm 3.24; 6.13; Kwa 2.12-13 **2:6** 2.6 1.3; Kwa 2.12; 3.1 **2:7** 2.7 1.7; Rm 5.20 **2:8** 2.8 Mt 20.15; Jan 4.10; SNM 15.11; Gal 2.16

maja ba. ¹⁰ Yaw, ara Gazlavay ma ka amba ya cæmkwa ta Yesu Kæriste. Da ray ñgene, Gazlavay ta vøndakwar heter mawiya la amba ya kakwa sløra hay masa maaya kalah. Sløra hay masa maaya hay a na, Gazlavay ta dïyndakwara cay amba ya kakwa.

Jøwif hay ta Jøwif hay ba hay macæmkaya pal ta fa Yesu Kæriste

¹¹ Da ray ñgene, wulkam, zleezle akwar na, kwara? Akwar ta yamawa daa sækway ñga *Jøwif hay daa ba. Jøwif hay a, a zølmakwar na, ndøhay manda-sla mandawal hay. Ata na, a løvam ata ndøhay maslatakaya mandawal. Ama *mesley mandawal na, ara cek masa ndøhay ma kamara fa vaw ata hay gway. ¹² Ahaw, daa ñgene na, akwar dørenj ta *Kæriste, *ndaw masa Gazlavay ma wala ñga løhdata ndøhay. Akwar na, ndøhay daa sækway ñga *Israyel hay ba, akwar mølak hay. Akwar daa *mejøwey-mey ñga Gazlavay ta Israyel hay daa ba. Daa mejøwey-mey a, Gazlavay a løvtar a da njeý ta ata ñga mandaw mandaw. Akwar manjatakaya da bøla, Gazlavay aa ta akwar daa ba, ka njam na, ñga ray akwar gway. ¹³ Ama akwar masa dørenj ta Gazlavay heyey na, wure keðe, akwar macæmkaya ta Yesu Kæriste. Gazlavay ta

2:9 2.9 Rm 3.28; 1Kwr 1.31; 2Tm 1.9; Tit 3.5 **2:10** 2.10 Tit 2.14 **2:11** 2.11 5.8; mesley mandawal: Gal 5.6; Føl 3.3 **2:11** 2.11-13 Rm 11.17 **2:12** 2.12 Rm 9.4; 1Kwr 15.19; Kwa 1.21-22; 1Tes 4.13; Gazlavay aa ta akwar ba: 2.19

ngəchadakurwa la a cakay a, ta fa mambaz nga Kəriste ma mbədfwa daa meməcey anɡa.

¹⁴ Fara fara, ara Kəriste ta ray anɡa ma handərwa zazay a wuzlah aləkwa. A handərwa zazay a daa masa anɡa ma cəmtar d̄ay a ndəhay Jəwif hay ta ndəhay Jəwif hay ba hay, nɡa key səkway pal. Zleezle na, ndəhay Jəwif hay ta ndəhay Jəwif hay ba hay a nɡəlam vaw ba. Məngəley-vaw ata ba nɡene na, ta tərey sem anda zleŋger da wuzlah ata ma wunkata. Anda kefe, ta fa meməcey nɡa Yesu na, zleŋger e, ta pəlhey sem.

¹⁵ *Kwakwas nɡa Mawiz na, mewey hay ga da hwaɗ a daha. Ama Kəriste ta nɡəchada kwakwas a sem ta cakay, amba a cəmtar d̄ay nɡa ndəhay Jəwif hay ta ndəhay Jəwif hay ba hay nɡa tərey səkway pal macəmkaya ta anɡa. Ara maja nɡene, zazay daha da wuzlah səkway hay cew e. ¹⁶ Ta fa meməcey anɡa fa hwadam mazlanɡalakaya na, Kəriste ta vavəsa məngəley-vaw ba da wuzlah səkway hay cew kefe heyey sem nɡa tərey səkway pal. Anda kefe, ta fa meməcey anɡa ha na, ta cəmtar d̄ay cay ta Gazlavay.

¹⁷ Kəriste a sawa na, nɡa wuzey *Mey-maaya-mawiya ma handawa zazay nɡada akwar Jəwif hay ba hay ma səmra Gazlavay ba zleezle, ta nɡada ala Jəwif hay masa ma səmra Gazlavay.

¹⁸ Yaw, ara ta fa Kəriste he aləkwa cəpa ma

2:13 2.13 akwar masa dərəŋ ta Gazlavay: 2.17; 3.6; mambaz: 1.7; Gal 1.4 **2:14** 2.14 zazay: 2.16; 4.3; Kwa 1.20; aləkwa səkway pal maja Yesu: 1.23; Rm 10.12; 1Kwr 12.13; Gal 3.28 **2:15** 2.15 2Kwr 5.17; Kwa 2.14 **2:16** 2.16 1.23; Rm 5.10; Kwa 1.20-22
2:17 2.17 Iz 57.18-19; SNM 2.39

høtkwa cøved nga daw a cakay Gazlavay, Papan, ta fa gødan nga Mesøfney anga pal.

¹⁹ Anda keðe, akwar ndøhay masa Jøwif hay ba hay na, akwar mølak hay saba, akwar maslah hay saba. Ama wure keðe na, akwar søkway pal ta ndøhay nga Gazlavay, akwar ndøhay daa vøged nga way pal ta ndøhay nga Gazlavay.

²⁰ Akwar na, anda anɣwa hay ma døzla way. Salay nga way a na, ara ndøhay meslørey nga Yesu ta ndøhay ma tøla mey nga Gazlavay. Yesu Køriste ta ray anga na, ara anɣwa mahura ma vølar gødan a way a. ²¹ Ara ta fa Yesu Køriste he, way a ma njeý maaya maaya ta gødan, a søkey, a key mahura amba way a, a tørey way nga Bay Gazlavay. ²² Maja akwar macømkaya ta Køriste na, Køriste he ta cømkwar la ta ndøhay anga hay mekele amba akwar may, ka tøram anda way a. Ara way masa Gazlavay ma njeý da hwad a ta fa Mesøfney anga.

3

Pawl a wuzey Mey-maaya-mawiya ngada ndøhay Jøwif hay ba hay

¹ Ara maja ngene, yah Pawl, ya fa dørey dangay maja akwar mandaw mandaw. Yah daa førsøne maja sløra nga Yesu *Køriste, masa yah ma ka ngada akwar *Jøwif hay ba hay.

² Akwar ma cøndamara mey da ray sløra

2:18 2.18 3.12; Rm 5.2 **2:19** 2.19 2.12; 3.6; Heb 12.22-23 **2:20** 2.20 Mt 16.18; 1Kwr 3.10-11; CWJ 21.14 **2:21** 2.21 1Kwr 3.16
2:22 2.22 1Pi 2.5 **3:1** 3.1 førsøne: 4.1; Føl 1.7; Kwa 4.18; Flm 1, 9 **3:1** 3.1-3 Kwa 1.25

masa Gazlavay ma vøldiwa nga key maja akwar la, ba diya? A vøldiwa sløra ha na, maja maaya anga. ³ Gazlavay ta wuzdiwa mey masa mabadakaya døga zleezle sem amba ya søra mey a. Yaw, daa leeter kefe na, ya taa guzlkwar la nekøfey da ray mey mabadakaya ha. ⁴ Masa akwar fa jangamara leeter he na, ka sørmara la, yah na, ya søra mey masa mabadakaya da ray Køriste maaya maaya. ⁵ Zleezle na, Gazlavay ta wuzdatara mey mabadakaya ha a ndøhay daa ba. Ama wure kefe, ta wuzdatara la ta fa Mesøfney anga ngada ndøhay masa aa ma walata wal nga tørey ndøhay meslørey nga Yesu ta nga tørey ndøhay ma tøla mey anga hay.

⁶ Ehe, mey mabadakaya ha na, a løvey Jøwif hay ba hay na, a høtam cek hay maaya masa Gazlavay ma diytara ngada ndøhay anga hay la letek ta ndøhay Jøwif hay. Jøwif hay ba hay ta Jøwif hay na, ta tøram sem anda vaw pal ta fa Køriste. Asaya, cek masa Gazlavay ma løvey a da vøldatara a ndøhay anga hay na, ndøhay Jøwif hay ba hay a da høtam letek anda ndøhay Jøwif hay may. A høtam cek hay maaya kefe na, maja ata ma tøbmara *Mey-maaya-mawiya, asaya, maja ata macømkaya ta Yesu Køriste.

⁷ Mey-maaya-mawiya ha na, Gazlavay ta paya la nga wuzda a ndøhay maja maaya anga. Ara ta fa gødan anga, yah ma tørey ndaw ma ka sløra anga ha. ⁸ Yah na, ndaw mecøhe da wuzlah ndøhay nga Gazlavay tabiya. Ta ngene he cøpa,

3:3 3.3 3.6 **3:4** 3.4 Rm 16.24; 2Kwr 11.6 **3:5** 3.5 Kwa 1.26 **3:6** 3.6 mey mabadakaya: 1.9-10; 2.13-14, 18-19; 3.9-11; Rm 16.25; Kwa 1.26-27

Gazlavay ta sərɤfaya dey-ceceh la, ta paya la nga wuzey Mey-maaya-mawiya a ndəhay Jəwif hay ba hay. Ya fa wuzdatara mepəsey-mey ma sawa ta fa Kəriste. Cek maaya daa mepəsey-mey a tabiya na, ndaw-magədan a gwa a səra ba.

⁹ Asaya, a paya nga wuzda mey mabadakaya zleezle heyey a ndəhay tabiya, amba a səmra cek hay a, a da kam na, kwara. Ara Gazlavay, ndaw ma ləma slam da vad ta slam da hwayak, ma bəda mey a dəga zleezle. ¹⁰ Ama wure keɤe ta wuzdərwa sem ta fa ndəhay daa *mecəmey-ray nga ndəhay nga Yesu. A wuzdərwa ta fa ata na, amba maslan anga hay da vad ta *bay-ray ata hay a səmra ləngesl maaya nga Gazlavay ma sərey cek hay mekele mekele cəpa. ¹¹ Dəga bəla ta zlar nga ləmey daa ba aran na, Gazlavay a, a ka kəne maja ta wudəy sem. A ka na, ta fa Yesu Kəriste, Bay aləkwa Mahura. ¹² Anda keɤe, ya gwakwa nga nğəchakwa asi har nga Bay Gazlavay ta mandərzay daa dey daa ba maja aləkwa macəmkaya ta Yesu Kəriste, asaya, maja aləkwa ndəhay ma pamara Yesu nga ndaw aləkwa fara fara. ¹³ Maja ngene, ya kakwar ambahw, ka da məcmara vaw akwar maja yah ma sərey banay maja akwar ba. Banay yah ma səra keɤe na, sasəkar jak a da kakwar maaya nğada fa mey.

Mey da ray mewudəy-vaw nga Yesu Kəriste

3:8 3.8 ndaw mecəhe: 1Kwr 15.8-10; Gal 1.13-16; Fəl 3.6-8; 1Tm 1.12-16 **3:9** 3.9 1.4 **3:10** 3.10 1.21, 23 **3:12** 3.12 Rm 5.2; Heb 4.16; 10.19 **3:13** 3.13 Kwa 1.24

¹⁴ Ara maja ṅgene, yah ma regedey fa mey ṅga Gazlavay Papan, ṅga dɛrar dangay maja akwar. ¹⁵ Ara aṅga ma patar mezɔley a sɛkway hay da gazlavay da vad ta da bɛla cɛpa, maja aṅga Papa alɛkwa. ¹⁶ Gazlavay aa ta gɛdan, cek hay tabiya ata dasi har aṅga. Da ray ṅgene, ya fa dɛrar dangay amba a vɛlkwar gɛdan ta fa Mesɛfney aṅga. Anda kedɛ, gɛdan aṅga ha ṅga njeɣ daa akwar ma fɛna ma fɛna.

¹⁷ Anja *Kɛriste ṅga njeɣ daa mevel akwar maja aṅga ndaw akwar fara fara. Asaya, anja akwar ṅga wudmara Gazlavay, anja akwar ṅga wudam vaw da wuzlah akwar. Da akwar fa wudam vaw kɛne na, ka da hɛtam gɛdan anda wudez masa slaslalay a dɛren daa vɛged, da daa ba, anda way malɛmkaya maaya maaya wurza ha mapakaya ta aṅgwa. ¹⁸ Anda kedɛ, akwar ta ndɛhay ṅga Gazlavay siya, ka sɛrmara la, Yesu Kɛriste na, fa wudndakwar kalah. Ka sɛrmara la, mewudɛy-vaw aṅga ha na, kwakway a daa ba. ¹⁹ Ahaw, mewudɛy-vaw aṅga ha na, ta fɛna lɛngesl ṅga ndaw-magɛdan sem. Ama ya fa dɛrey dangay amba ka sɛrmara mewudɛy-vaw aṅga ha fara fara cɛṅga. Anda kedɛ, ka da hɛtam menjeɣ maaya letɛk anda ṅga Gazlavay, asaya, Gazlavay a, ray aṅga, a da njeɣ ta akwar mandaw mandaw.

²⁰ Yaw, Gazlavay a, a gwa ṅga vɛlndakwar cek ma fɛna masa alɛkwa maa cɛfdafakwar, asaya, a gwa ṅga kandakwar cek masa ma fɛna

3:14 3.14 6.18-19 **3:16** 3.16 Kwa 1.11 **3:17** 3.17 Jan 14.23;
Ef 5.2; Kwa 1.23; 2.7 **3:18** 3.18 Kwa 2.2 **3:19** 3.19 1.23; 5.2,
25; 2Kwr 5.14; Kwa 2.9-10

mewulkey aləkwa, maja anğa fa key sləra daa mevel aləkwa ta gədan anğa. ²¹ Həlmakwa Bay Gazlavay maja ndəhay daa *mecəmey-ray nğa ndəhay nğa Yesu leŋ maja Yesu Kəriste he ray anğa. Anja ndəhay nğa həlmamara Gazlavay nğa sərmataw. *Amen.

4

Mey da ray mecəmey-ray nğa ndəhay nğa Yesu

¹ Maja cek hay tabiya masa Gazlavay ma kakwara ta fa *Kəriste na, yah Pawl, ya fa kətkwar, yah ndaw masa daa fərsəne maja Bay aləkwa Mahura. Akwar masa Gazlavay ma zəlkwar nğa tərey bəz anğa hay na, ya fa kətkwar amba menjey akwar a key anda aa ma wudfey. ² Anda meləvey, daa cek hay masa akwar ma kamara cəpa na, kamara ta meney ray, ta meekwed-mey, ka da cam mevel saw saw ba. Da ndəhay da wuzlah akwar ta kamakwar cek hay maaya ba la na, bəsmara gway, wudam vaw da wuzlah akwar. ³ *Mesəfney nğa Gazlavay ta cəmkwar ray la pal. Anda kedə, kam gədan amba ka njam macəmkaya daa zazay. ⁴ Aləkwa ndəhay daa *mecəmey-ray nğa ndəhay nğa Yesu na, aləkwa ma tərkwə sem anda vaw pal. Ara Mesəfney nğa Gazlavay pal da ray aləkwa. Asaya, aləkwa masa Gazlavay ma zəldakwar na, aləkwa fa səkwakwa cek hay maaya letək masa Gazlavay ma da vəldatara a ndəhay anğa hay.

3:20 3.20 Kwa 1.29 **4:1** 4.1 3.1 **4:2** 4.2 5.2; Rm 8.13; Gal 6.8; Kwa 3.9; Kwa 3.12-13 **4:3** 4.3 2.14-16; Kwa 3.14-15 **4:4** 4.4 1.23; 2.18

⁵ Bay aləkwa Mahura, anğa pal. Mey masa aləkwa ma təkwa, anğa pal. *Baptem, anğa pal. ⁶ Gazlavay masa aləkwa ma nakwar ray may, anğa pal. Anğa Papa aləkwa tabiya, fa wey da ray aləkwa tabiya, fa key sləra da wuzlah aləkwa tabiya, asaya, aa daa mevel aləkwa tabiya.

⁷ Ama Kəriste ta vəlndakwar gədan la wal wal nğa key sləra anğa. A vəldandakwara gədan a na, ta har cew cew, anda aa ma wudəy nğa vəlda sləra a ndaw a, a ndaw a. ⁸ Ara maja ngene, mawuzlalakaya daa dferewel nğa Gazlavay, a ləvey:

«Daa masa anğa ma təpey a vad na,
Ta handata masa-gəra anğa hay
masa aa ma kərzatərwa daa vəram la.
Fa dəba ha, ta', a vəley cek hay mekele mekele a
ndəhay.»

⁹ Yaw, mey ma ləvey: «Anğa ma təpey a vad na,» a wudəy nğa ləvey kwara? Mey a, a wudəy nğa ləvey na, Kəriste ta pawa salay la a bəla fedə dğay. ¹⁰ Kəriste ma pawa salay a bəla heyey na, ara anğa saya ma təpey a vad haa a wusey a cakay Bay Gazlavay, amba a wey da ray cek hay kwa daa wura daa wura cəpa. ¹¹ Gədan masa wal wal a na, ara Kəriste he ta ray anğa ma vəltar a ndəhay. A vəltar gədan a siya hay nğa tərey ndəhay meslərey anğa hay, siya hay nğa tərey ndəhay ma təla mey nğa Gazlavay,

4:5 4.5 Jan 10.16; 1Kwr 8.6; baptem: Mt 28.19; Rm 6.3-4 **4:6**
4.6 1Kwr 12.6 **4:7** 4.7 Rm 12.3, 6; 1Kwr 12.11 **4:8** 4.8 Ps
68.19 **4:9** 4.9 Jan 3.13 **4:10** 4.10 1.23

siya hay may nga wuzey *Mey-maaya-mawiya a ndəhay. Siya hay saya a vəltar gədanj nga tərey anda mecəkwer hay nga ndəhay ma təba mey nga Yesu, aa sərkadamata ndəhay da ray mey nga Gazlavay. ¹² Kəriste he a ka kəne na, amba ndəhay a, a jənmata ndəhay nga Gazlavay nga key sləra ngada anja. Anda kedə, ndəhay daa mecəmey-ray nga ndəhay nga Kəriste, a hətam gədanj daa mey nga Gazlavay la ma fəna ma fəna.

¹³ Ahaw, aləkwa tabiya ya cəmkwa ray la pal daa metəbey-mey pal nga Bəzey nga Gazlavay, asaya, ya da sərkwə Bəzey a fara fara. Da ray ngenə, ya da tərkwə ndəhay manjaratakaya daa mey nga Gazlavay, anda meləvey, ya da tərkwə ndəhay maaya kalah anda Kəriste.

¹⁴ Anda kedə, aləkwa anda bəza hay saba, aləkwa anda hwahwayak masa memed ma həla saw saw saba. Yaw, ndəhay ma mbərzlam fa da gwamara nga batamandakwar ta meesərkedey ata, amba ya təbkwa membərzley ata ha ngaa zəddandakwar na, daa saba.

¹⁵ Maaya na, ya mbərzlakwa ba, ya wuzkwa mey maaya fara fara da ray Gazlavay, asaya, ya wudkwa vaw da wuzlah aləkwa. Da aləkwa fa kakwa kəne na, ya nakwa la fa mey fa mey haa ya tərkwə anda Kəriste. Anja na, *bay-ray nga ndəhay daa mecəmey-ray anja. ¹⁶ Ara anja ma cəmtar ray nga ndəhay anja hay anda vaw nga ndaw pal maləmkaya ta mezəvey hay

4:11 4.11 1Kwr 12.28 **4:12** 4.12 1Kwr 14.26 **4:13** 4.13 Kwa 1.28 **4:14** 4.14 1Kwr 14.20; Heb 5.13-14; Jak 1.6 **4:15** 4.15 1.22 **4:15** 4.15-16 5.2

mekele mekele. Da mezøvey nga vaw hay cøpa ata wurwer na, ñgene vaw tabiya a gøley, a høtey gødan. Ara køne may ñgada ndøhay daa mecømey-ray nga ndøhay nga Yesu. Da ndøhay a, fa wudam vaw da wuzlah ata, asaya, da kwa waawa fa ka sløra anga na, mecømey-ray a, a høtey gødan la ma føna ma føna.

Pawl a køtata Efez hay nga mbøddamara menjeý ata

¹⁷ Ara maja ñgene, yah, Pawl, ya fa køtkwar, asaya, ya fa pakwar lenge-sl ta mezøley nga Bay aløkwa Mahura, ya løvkwar: ka da njam anda ndøhay ma sørmara Gazlavay ba saba. Mewulkey nga ndøhay a na, saw køne. ¹⁸ Ata daa løvan. Cek masa Gazlavay ma wudøy na, a gwamara nga cøndamara ba. Ata mølak hay fa mey nga Gazlavay, ta høtam heter mendøvey ba na, daa ba, maja a gømam nga cøndamara ba sølak, a sørmara Gazlavay ba. ¹⁹ Hwaray daa dey ata daa ba, a kam cek anda mevel ata ma wudøy. Fa lam vaw saw da palah mandaw mandaw, fa kam cek hay malamba mekele mekele may.

²⁰ Ama akwar na, aa sørkadamakwar da ray *Køriste na, anda ñgene ba. ²¹ Akwar ta cøndamara mey da ray Køriste la, ba diya? Akwar masa macømkaya ta Yesu na, taa sørkadamakwara mey fara fara masa Yesu a ma wuzdandakwara la, ba diya? ²² Zleezle na, ka wudam nga key cek hay malamba ma bata ndaw. Cek hay malamba hay a ta nøskwar sem.

4:16 4.16 1.23; 2.21-22; 4.13, 25; Kwa 2.19 **4:17** 4.17-18 5.8;
Rm 1.21; 1Pi 1.14 **4:19** 4.19 Kwa 3.5

Yaw, maaya na, ka mbəkdamara menjey akwar masa zleezle ηgene, anda ndaw ma mbəkda zana magurma. ²³ Mbəđdamara mevel akwar ta lengeſl akwar tabiya. ²⁴ Təbmara menjey mawiya masa Gazlavay ma điykwara anda ndaw ma kəzley zana mawiya fa vaw. Menjey a na, ara menjey maaya ta cəved e, ma mbafar a Gazlavay anda mey ηga Gazlavay masa fara fara maa sərkadandakwara.

²⁵ Da ray ηgene, ka da mbərzlam saba. Maaya na, kwa waawa ηгаа guzley mey maaya fara fara a ndaw, maja aləkwa tabiya macəm kaya anda vaw pal. ²⁶ Da mevel fa cakwar na, wam vaw, ka kam mebərey ba. Ka da vərndam daa mecey-mevel haa pas a kəzley ba. ²⁷ Ka da vəlmar cəved ηgada bay-malula ηga wey da ray akwar ba. ²⁸ Da ndaw fa leley na, anja ηga leley saba. Ama maaya na, ηga key sləra maaya ta har aηga, amba a hətəy cek, a jəney ndəhay masa-viya hay may. ²⁹ Ka daa guzlam mey malamba a ndəhay ba. Ama da akwar faa guzlam na, gwaguzlam mey maaya ma jənta ndəhay daa mey ηga Gazlavay, mey maaya ma điyta ndəhay masa ma jəkfamakwar sləmay.

³⁰ Ka da kam cek ma car mevel a *Mesəfney ηga Gazlavay ba, maja Mesəfney a, ara anda cek matəhkaya fa dangay akwar ηga sərey akwar na, ndəhay ηga Gazlavay. Mesəfney a, a da nje

4:23 4.23 Rm 12.2 **4:24** 4.24 MC 1.26-27; 2Kwr 5.17; Kwa 3.10

4:25 4.25 4.16; Zak 8.16-17; Kwa 3.8-9 **4:26** 4.26 Jak 1.19-20

4:28 4.28 1Tes 4.11 **4:29** 4.29 5.4; Kwa 3.8; 4.6; Jak 3.10

a ray akwar haa ta pas masa Gazlavay ma da ləhdakwar daa cek hay maaya ba da bəla keɗe.

³¹ Mbəkdamara mepəley cəhwal ta mepey mey aa mevel da ray ndaw, leŋ mecey-mevel da ray ndaw. Mbəkdamara mekey baazlam da wuzlah akwar ta mekey mbada fa ndaw. Cek hay malamba tabiya anda keɗe na, ŋgəcham dərəŋ ta ata. ³² Anda keɗe, təram ndəhay maaya, wuɗam vaw, səram dey-ceceh da wuzlah akwar. Mbəkdamatara mebərey ŋga ndəhay da wuzlah akwar anda Gazlavay ma mbəkdwara mebərey akwar ta fa Kəriste may.

5

Mey da ray menjey maaya ŋga ndəhay ma təba mey ŋga Yesu

¹ Wure keɗe, akwar na, bəza hay ŋga Gazlavay mawuɗtakaya. Da ray ŋgene, kam cek maaya anda Gazlavay ma ka. ² Daa menjey akwar tabiya na, wuɗam vaw da wuzlah akwar anda *Kəriste ma wuɗndakwar. Ta vəlda ray aŋga la ŋga məcey maja aləkwa, anda gənaŋw masa ndəhay ma hərmara zleezle ŋga vəley a Gazlavay. Anda keɗe, a mbafar a Gazlavay anda cek mezey maaya.

³ Akwar na, ndəhay ŋga Gazlavay. Da ray ŋgene, da wuzlah akwar na, aŋga maaya ba ŋga ley vaw saw da palah, ta ŋga key cek hay ma

4:30 4.30 1.13-14; Iz 63.10; Rm 8.23; Gal 5.25 **4:32** 4.32 Mt 6.14; 18.22-35; Kwa 3.12-13 **5:1** 5.1 Mt 5.48; 1Jn 3.1 **5:2** 5.2 3.17-18; 4.2, 15-16; 1Kwr 8.1; 2Kwr 5.14; Gal 6.10; Fəl 2.2; Kwa 2.2; 3.14-15; a vəlda ray aŋga: Gal 1.4; Heb 10.5-10

ka hwaray, leŋ ŋga key dey fa cek ŋga ndaw. Søkway ŋga cek hay anda ŋgene na, kwa ŋga cəney da wuzlah akwar ba səlak. ⁴ Ka daa guzlam mey hay saw ba, asaya, ka daa guzlam mey hay ma ka hwaray ba. Mey hay anda ŋgene na, maaya ba. Maaya na, ka kam suse a Gazlavay. ⁵ Sərmara maaya maaya, ndəhay ma lam vaw saw da palah, ta ndəhay ma kam cek hay ma ka hwaray na, fa da mbəzam aa slam masa Kəriste ta Gazlavay fa wam da vad na, daa ba. Fa da hətam cek hay maaya masa Gazlavay ma da vəldatara a ndəhay aŋga hay na, daa ba. Asaya, ndəhay ma kam dey fa cek ŋga ndaw na, fa da mbəzam aa slam aha daa ba may, maja da fa kam dey fa cek ŋga ndaw na, a ragadamar a cek aha aa slam a ŋga Gazlavay.

⁶ Ara maja cek hay malamba hay ŋgene, Gazlavay ma da cey mevel a ray ndəhay ma namar ray ba. Da ray ŋgene, ka da vəlmatar cəved a ndəhay ŋga batamakwar ta mey hay saw ba. ⁷ Kwa ka da cəmam ta ndəhay anda ŋgene ba səlak. ⁸ Zleezle na, akwar daa ləvaŋ. Ama wure kedə na, akwar daa slam-mewedəy maja akwar macəmkaya ta Bay Mahura. Anda kedə, kam cek anda ndəhay ma njam daa slam-mewedəy, ⁹ maja ndəhay ma njam daa slam-mewedəy na, a kam cek maaya, a kam cek ta cəved e, a mbərzlam ba. ¹⁰ Səpam ŋga key

5:3 5.3 Kwa 3.5 **5:3** 5.3-5 Gal 5.19-21 **5:4** 5.4 4.29; Kwa 3.8
5:5 5.5 Rm 5.17 **5:6** 5.6 Rm 1.18; Ef 2.3; Kwa 2.4, 8; 3.6 **5:8**
5.8 ləvaŋ; 2.3, 11-12; 4.17-18, 22; Kwa 3.7; Tit 3.3; slam-mewedəy:
Jan 8.12; Kwa 1.13; 1Pi 2.9 **5:9** 5.9 Gal 5.22-23

cek masa ma mbafar a Gazlavay. ¹¹ Ka da kam cek hay malamba anda ndəhay daa ləvan ma kamara ba. Cek hay masa ata ma kamara ŋgene na, ara cek ŋga tede. Ama wuzdamara cek masa ata ma kamara maaya ba ha ŋgene. ¹² Fara fara, kwa ŋгаа guzley da ray cek hay masa ata ma kamara ta mebey a ŋgene na, a key hwaray. ¹³ Ama da cek malamba mabadakaya ta wuzwa sem a palah na, ndəhay a hətmar maaya maaya, a sərmara ara cek malamba. ¹⁴ Anda meləvey, daa slam-mewedey na, cek malamba a hətəy maaya maaya. Ara maja ŋgene mey daha fa ləvey:

«Kah, ndaw masa manakaya,

Sləkdey daa d̄ar.

Kah, ndaw masa maməckaya,

Sləkdawa daa meməcey a.

Amba mewedey ŋga Kəriste a sawa a ray akah.»

¹⁵ Da ray ŋgene, wam vaw fa menjey akwar, ka da kam cek hay anda ndəhay manjar lenjesl hay ba. Ama kam cek hay anda ndəhay ta lenjesl maaya. ¹⁶ Da akwar ma hətam har la ŋga key cek maaya na, kamara, maja wure kedə na, ndəhay fa kam cek hay malamba kalah. ¹⁷ Anda kedə, ka da rəzlam ba, ama səpam na, ŋga sərey cek maaya masa Bay Mahura ma wudəy fa akwar.

¹⁸ Ka da sam wuzam ŋga wey ba, maja wuzam na, a nəsa menjey ŋga ndaw. Ama vəlmar cəved a *Mesəfney ŋga Gazlavay ŋga njeý daa mevel

5:10 5.10 Rm 12.2; 1Tes 5.22 **5:13** 5.13 Jan 3.20-21 **5:14**
5.14 Iz 26.19; 60.1; Rm 13.11; Jak 5.8 **5:16** 5.16 Kwa 4.5 **5:17**
5.17 1.17; Rm 12.2

akwar mandaw mandaw. ¹⁹ Zlam walay da wuzlah akwar ta meesəmey, walay hay masa Mesəfney nga Gazlavay ma vəkwar gədanj nga zla. Zlam walay hay daa *Pəsam hay *, ta walay hay mekele ma həlma Bay Gazlavay. Zlamar walay hay nga həlma Bay akwar Mahura, həlmamara ta mevel akwar cəpa. ²⁰ Kamar suse a Gazlavay Papa aləkwa maja cek hay tabiya. Kamar suse mandaw mandaw ta mezəley nga Bay aləkwa Mahura Yesu Kəriste.

Mey da ray menjey nga ngwas ta zel e

²¹ Akwar ndəhay masa ma namar ray a *Kəriste na, nam ray a ndaw a, a ndaw a da wuzlah akwar may.

²² Akwar ngusay, namatar ray a zel akwar hay, ara cek ma mbafar a Bay Mahura. ²³ Maja zel na, ara *bay-ray nga ngwas, anda Kəriste ma key bay-ray nga ndəhay daa mecəmey-ray anja. Mecəmey-ray nga ndəhay anja hay a na, ara anda vaw anja. Ara Kəriste he ma ləhdata ndəhay daa mecəmey-ray anja ha daa mebərey.

²⁴ Da ray ngene, anda ndəhay daa mecəmey-ray nga Kəriste ma namar ray a Kəriste he na,

5:18 5.18 MM 23.31-35; Rm 13.13 * **5:19** 5.19 Pəsam hay na, ara walay hay masa Bay Davit ta ndəhay Jəwif hay mekele ma zlamata zleezle. Walay hay a na, mawuzlalatakaya daa mey nga Gazlavay nga *Mejəwey-mey Magurma. Ta mey Pəлта a zəlmara «Jabuura». **5:19** 5.19-20 Ps 33.2-3; Kwa 3.16-17; Heb 13.15

5:21 5.21 1Pi 5.5 **5:21** 5.21-6.9 Kwa 3.18-4.1; 1Pi 2.18-3.7; 1Tm 2.1-13; Tit 2.1-10; 1Jn 2.12-17 **5:22** 5.22 1Kwr 14.34-35

5:22 5.22-24 Kwa 3.18; Tit 2.5; 1Pi 3.1 **5:23** 5.23 1.22; 1Kwr 11.3

akwar ngusay may, namatar ray a zel akwar hay daa cek hay tabiya masa akwar ma kamara.

²⁵ Akwar zel hay may, wudmata ngwas akwar hay anda Kõriste ma wudta ndõhay daa mecõmey-ray anga. Ta võlda ray anga la nga mõcey maja ata, ²⁶ amba a tõrdana nga ndõhay maaya manjar mebõrey ta fa yam nga *baptem, asaya, ta fa mey anga. ²⁷ Kõriste a võlda ray anga na, amba a tõbta ndõhay daa mecõmey-ray anga anda ndaw ma ley kwakwa membey, asaya, amba ndõhay anga hay a, a tõram ndõhay mapõrtakaya, kwa mebõrey ta cek maaya ba fa ata na, daa ba. ²⁸ Ara anda kede, zel may, si a wudta ngwas anga anda anga ma wudta ray anga. Ndaw ma wudta ngwas anga na, a key ngene, a wudney ray anga. ²⁹ Fara fara, ndaw ma wudta ray anga ba na, daa ba. Ama kwa waawa fa zõmey cek, fa wey vaw ta ray anga anda Kõriste ma wey vaw ta ndõhay daa mecõmey-ray anga may. ³⁰ Kaa alõkwa na, ndõhay daa mecõmey-ray nga Kõriste, ba diya?

³¹ Mawuzlalakaya daa mey nga Gazlavay, a lõvey: «Maja ngene, ndaw-mezõle a mbõkda papaha ta mamaha, amba a cõmam ta ngwas anga, a tõram anda ndaw pal.» ³² Mey a kede na, mey mahura mabadakaya da hwad a daha. Yah na, ya fa lõvkwat, mey a kede aa guzley da ray Kõriste ta ndõhay daa mecõmey-ray anga.

³³ Mey a faa guzley may ngada akwar. Anja kwa

5:25 5.25 3.19 **5:25** 5.25-28 1.23; Kwa 3.19; 1Pi 3.7 **5:26** 5.26 baptem: Rm 6.3-4; Tit 3.5; Heb 10.22 **5:27** 5.27 1.4; 2Kwr 11.2; Fõl 1.10; Kwa 1.22 **5:30** 5.30 1.23; 1Kwr 12.27 **5:31** 5.31 MC 2.24 **5:32** 5.32 CWJ 19.7

waawa da wuzlah akwar nga wuɗa ngwas anɗa anda anɗa ma wuɗa ray anɗa. Akwar ngusay may, kwa waawa nga nar ray a zel e.

6

Menjey nga bəza hay da cakay papa ata hay ta mama ata hay na, kwara?

¹ Akwar bəza hay, akwar macəmkaya ta Bay Mahura, cənmatar mey a papakw akwar hay ta mamakw akwar hay maja ara cek maaya.

²⁻³ *Mewey nga Gazlavay daha fa ləvey: «Natar ray ngada ata papakw ta mamakw.» Mewey a keɗe na, ara mewey ngeeme daa masa Gazlavay ma ləvey a da kandakwar cek maaya, da aləkwa ta səpkwa mey a la. Cek maaya ha na, ara «Ka hətam zazay la, ka njam la ga da bəla keɗe.»

⁴ Akwar papaŋ hay may, ka da kam cek nga catar mevel a bəz akwar hay ba. Ama, kətmata, sasərkadamata maaya maaya anda Bay Mahura ma wuɗey.

Mey da ray beke hay ta ndəhay ma wamata

⁵ Akwar beke hay, namatar ray a bay akwar hay da bəla keɗe ta mevel pal, cənmatar mey. Namatar ray anda akwar ma namar ray a *Kəriste. ⁶ Ka da cənmatar mey na, fa dey ata daada amba aa həmdamakwar ba, ama kam cek masa Gazlavay ma wuɗey ta gədaŋ akwar cəpa, maja akwar na, anda beke hay nga Kəriste.

⁷ Kamatar sləra a bay akwar hay ta meesəmey

6:1 6.1 Kwa 3.20 **6:2-3** 6.2-3 Mew 5.16 **6:4** 6.4 Kwa 3.21

6:5 6.5-8 Kwa 3.22-25; 1Tm 6.1-2; Tit 2.9-10; 1Pi 2.18-21 **6:6**

6.6 1Kwr 7.22

anda ka kamara na, ngada Bay Mahura, ba na, ngada ndaw-magədan̄ ba. ⁸ Sərmara, da ndaw ta key sləra maaya la kwa an̄ga beke, kwa an̄ga beke ba na, Bay Mahura a pəlra mawurɓay an̄ga la.

⁹ Yaw, akwar ndəhay ma wamata beke hay may, kərzamata beke akwar hay ta cəved̄ e, ka da həlmatar dey ba. Si ka sərmara na, akwar ta beke akwar hay a na, Bay akwar pal da gazlavay da vad̄ daha. An̄ga na, a weley ndaw ta weley ba, a nəkta ndəhay tabiya letək fa mey an̄ga.

Ma da key vərəm ta bay-malula na, ta me?

¹⁰ Ehe, mey adaw mekele ngada akwar: Njam macəmkaya ta Bay Mahura amba ka hətam gədan̄ an̄ga masa mahura. ¹¹ Jəwmata vaw akwar hay ta cek hay ma ka vərəm masa Gazlavay ma vəldakwara. Anda keɗe, ta pas masa bay-malula fa da batakwara na, ka hətam gədan̄ la n̄ga fəna wewer an̄ga. ¹² Ya da kakwa vərəm na, ta ndəhay magədan̄ ba, ama ta *bay-ray hay n̄ga mesəfney maaya ba hay masa ta gədan̄ ga, ma wam da ray cek hay daa ləvan̄ da bəla keɗe. Asaya, ya da kakwa vərəm na, ta mesəfney maaya ba hay ma wam da vad̄.

¹³ Ara maja n̄gene, lamata cek hay tabiya ma ka vərəm masa Gazlavay ma vəldakwara heyey. Anda keɗe, da masa pas n̄ga vərəm ta wuswa cay na, ka jaram la fa masa-gəra akwar hay. Ka da kam vərəm ta masa-gəra akwar hay a haa

6:8 6.8 2Kwr 5.10; Kwa 3.24-25 **6:9** 6.9 Kwa 3.25; 4.1; Jak 2.1 **6:10** 6.10 Jan̄ 15.5; 1Kwr 16.13 **6:11** 6.11 Jak 4.7 **6:11** 6.11-17 2Kwr 10.4; 1Tes 5.8; Iz 59.17 **6:12** 6.12 1.21; 2.2; 1Pi 5.8-9

mendøvey a. Fa døba ha, ka da lacam denj e! akwar bay-gula hay.

¹⁴ Jøwmata vaw akwar hay maaya maaya, anda meløvey, njam ta mey masa fara fara ta membørzley da hwađ a daa ba. Mey masa fara fara ha na, ara anda senter masa ndaw-sewje ma jøwda vaw amba a key vøram ta gøra ba. Kam cek ta cøved e. Mekey cek ta cøved e na, ara anda zana nga børey masa sewje ma bərđa fa dadak nga key vøram. ¹⁵ Diyam vaw nga wuzey *Mey-maaya-mawiya ma handawa zazay. Mediyey vaw a na, ara anda tarak masa sewje ma pa a salay amba a jerey.

¹⁶ Daa cek hay masa akwar ma kamata cøpa na, pamara Yesu nga ndaw akwar fara fara mandaw mandaw. Ka kamara køne na, ara anda mbaray masa sewje ma kørza a har. Ta mbaray a, ka da jaram fa løvat hay tabiya ta awaw da mey a masa bay-malula ma da mølkwar ta anga. ¹⁷ Sørmara na, Gazlavay ta løhdakwar cay. Meløhey a ngene na, ara anda jikwew nga børey masa sewje ma pa a ray nga key vøram. Mey nga Gazlavay masa Mesøfney anga ma vøldakwara na, kørzamara maaya maaya, ara anda dølav nga key vøram ta bay-malula.

¹⁸ Døram dangay mandaw mandaw ta gøđan masa *Mesøfney nga Gazlavay ma vøldakwara. Cacøfdamara Gazlavay nga jønkwar kwa daa meeme tabiya. Daa medørey-dangay akwar na, ka da gøram ba, mayad a da kakwar ba. Døram

dangay maja ndəhay tabiya ma təbmara mey nga Gazlavay. ¹⁹ Daa medərey-dangay akwar a na, sərfadamaya may, amba Gazlavay a balaya mey hay maaya maaya ta pas masa yah ma daa guzley fa mey nga ndəhay. Cacəfdamara Gazlavay amba yaa sərkadatarə mey mabadakaya daa Mey-maaya-mawiya a ndəhay ta mandərzay daa dey daa ba. ²⁰ Yesu *Kəriste ta walaya la nga key ndaw anga meslərey, amba ya wuzda Mey-maaya-mawiya ha. Ara maja ngene, ata ma kəzlamaya aa fərsəne. Da ray ngene, dəräm dangay maja yah, amba ya wuzda Mey-maaya-mawiya fa mey nga ndəhay ta cəved e, anda Gazlavay ma wudəy.

Mey nga madagway-dakw

²¹ Ya fa wudəy amba ka sərmara menjey adaw fedə. Da ray ngene, Tisik masa mələma aləkwa daa cəved nga *Kəriste, a kadakwara sləra adaw ta menjey adaw ha la. Anga ndaw masa yah ma wuda kalah, anga fa key sləra nga Bay Mahura ta mevel pal. ²² Maja ngene, ya fa slərdakwara Tisik e amba ka sərmara menjey ala fedə, asaya, amba a vəlkwar gədan.

²³ Akwar mələma adaw hay, anja Gazlavay Papa aləkwa ta Bay aləkwa Mahura Yesu Kəriste nga njadamakwar daa zazay, nga handamawa mewudəy-vaw a wuzlah akwar, asaya, nga njadamakwar daa metəbey-mey. ²⁴ Anja maaya

6:18 6.18-19 3.14; Lk 18.1; SNM 4.29; Rm 15.30; Kwa 4.2-4 **6:20** 6.20 3.2; 2Kwr 5.20; Kwa 4.4 **6:21** 6.21-22 Tisik: SNM 20.4; Kwa 4.7-8; 2Tm 4.12; Tit 3.12 **6:23** 6.23 zazay, mewudəy-vaw: 2Kwr 13.11

nga Gazlavay nga njeɣ ta ndəhay tabiya ma wudmara Bay aləkwa Mahura Yesu Kəriste ta mewudfey-vaw masa fara fara mendəvey ba.

Mejəwey-mey Mawiya
Mofu-Gudur: Mejəwey-mey Mawiya New Testament
Le Nouveau Testament en langue Mofu-Gudur
(Cameroun)

copyright © 2007 Wycliffe Bible Translators, Inc.

Language: (Mofu-Gudur)

Contributor: Aramaic Bible Translation, Inc.

All rights reserved.

2020-11-19

PDF generated using Haiola and XeLaTeX on 21 Feb 2024 from source
files dated 29 Jan 2022

2b021919-36cf-59da-a35f-10c5e5548811